

20/02/1998

Masyarakat perlu kuasai teknologi

Muhd Yusuf Abu Bakar

PEMBANGUNAN dan kemajuan masyarakat madani bergantung sepenuhnya kepada pendidikan yang disalurkan kepada masyarakat, kata Datuk Seri Dr Mahathir Mohamad.

Perdana Menteri berkata masyarakat perlu lebih bersedia menghadapi abad akan datang melalui penguasaan teknologi dan pengetahuan kreatif yang memberi manfaat kepada semua pihak.

Menurut beliau, masyarakat dan negara hanya boleh bersaing pada peringkat antarabangsa sekiranya mereka memberi perhatian serius terhadap perkembangan pembangunan pendidikan dalam masyarakat negara maju.

Beliau berkata demikian dalam buku cenderamata sempena Pameran Pendidikan Malaysia yang dianjurkan Kementerian Pendidikan selama dua hari di Bandar Seri Begawan, Brunei Darussalam mulai semalam.

Sebanyak 42 universiti dan kolej mengambil bahagian dalam pameran itu yang dirasmikan Menteri Pendidikan Brunei, Pehin Orang Kaya Laila Wijaya Dato Haji Abdul Aziz Umar. Turut hadir Menteri Pendidikan Datuk Seri Najib Tun Abdul Razak.

Pameran yang pertama kali diadakan di luar negara itu adalah sebahagian daripada usaha Malaysia untuk menarik pelajar asing untuk melanjutkan pelajaran tinggi di Malaysia selaras dengan usaha kerajaan untuk menjadikan Malaysia sebagai pusat kecemerlangan ilmu serantau. Pameran kedua dijangkakan diadakan di Indonesia April ini dan diikuti dengan Thailand.

Dr Mahathir berkata, reformasi pendidikan yang dilaksanakan di Malaysia menunjukkan kejayaan dalam membentuk sistem tersendiri bagi keperluan dan kehendak masyarakat Malaysia.

"Ini dapat dicapai melalui usaha gigih sektor awam dan swasta yang bekerjasama dengan rangkaian institusi pendidikan tinggi luar negara bagi memastikan pendidikan di Malaysia memenuhi keperluan penduduk," katanya.

Menurutnya, negara kini dalam proses membina sistem pendidikan bertaraf dunia yang lebih anjal dan inovatif bagi membolehkan negara bersaing dalam kemajuan dunia tanpa sempadan sekarang.

"Selaras dengan usaha memakmurkan negara kita yang menjadi dasar negara, Malaysia berharap dapat menjadi pusat kecemerlangan ilmu serantau dan berkongsi dengan negara serantau kemajuan dan kekayaan yang negara nikmati," katanya.

Dr Mahathir berkata pameran yang diadakan itu adalah sebahagian daripada usaha Malaysia membawa pembangunan dan kemakmuran kepada negara jiran melalui pendidikan.

"Kita berharap usaha disalurkan itu dapat meningkatkan hubungan pendidikan di kalangan negara Asean bagi membolehkan kita bersama menghadapi cabaran abad ke-21," katanya.

(END)